

**SIARAN AKHBAR****SESI MUZAKARAH KEMENTERIAN SUMBER-SUMBER UTAMA DAN PELANCONGAN BERSAMA YANG BERHORMAT AHLI-AHLI MAJLIS MESYUARAT NEGARA**

Bandar Seri Begawan. Selasa, 14 Februari 2023M. Kementerian Sumber-Sumber Utama dan Pelancongan (KSSUP), hari ini telah mengadakan sesi muzakarah bersama Yang Berhormat Ahli-Ahli Majlis Mesyuarat Negara (MMN) yang dihadiri oleh Yang Berhormat Dato Seri Setia Dr Haji Abdul Manaf Bin Haji Metussin, Menteri Sumber-Sumber Utama dan Pelancongan. Seramai 18 orang ahli MMN yang diketuai oleh Yang Berhormat Dr Awang Haji Mahali bin Haji Momin, hadir pada sesi muzakarah berkenaan yang berlangsung di Dewan Setia Pahlawan, KSSUP.

Turut hadir ialah Yang Mulia Dayang Hajah Tutiaty binti Haji Abdul Wahab, Setiausaha Tetap Kementerian Sumber-Sumber Utama dan Pelancongan; Yang Mulia Awang Haji Mohd Yusree bin Haji Junaidi, Timbalan Setiausaha Tetap I; Yang Mulia Dayang Noralinda binti Haji Ibrahim, Pemangku Timbalan Setiausaha Tetap II; Pengarah-Pengarah Jabatan dan Ketua-Ketua Bahagian serta pegawai-pegawai kanan Kementerian berkenaan dan Jabatan-Jabatan di bawahnya.

Sesi muzakarah dimulakan dengan ucapan alu-aluan daripada Yang Berhormat Menteri Sumber-Sumber Utama dan Pelancongan, yang antara lain mengongsikan mengenai dengan hala tuju strategik serta fokus utama Kementerian Sumber-Sumber Utama dan Pelancongan dalam meningkatkan keluaran industri sumber-sumber utama dan pelancongan.

Yang Berhormat Menteri Sumber-Sumber Utama dan Pelancongan dalam ucapannya menyatakan bahawa dengan Negara kini sudahpun berada dalam Fasa Endemik dan dengan adanya pelonggaran terhadap beberapa lagi langkah pengawalan bagi membendung penularan wabak COVID-19 pada tahun lepas, ianya sedikit sebanyak telah memberikan kelegaan kepada para pengusaha, petani, penternak dan nelayan, bagi meneruskan usaha, dalam keadaan "norma baru", ke arah menggiatkan aktiviti-aktiviti dan meningkatkan hasil keluaran perusahaan dan perladangan masing-masing, serta sumbangannya kepada pertumbuhan ekonomi Negara, peningkatan eksport dan jaminan sekuriti makanan.

Pihak Kementerian Sumber-Sumber Utama dan Pelancongan melalui Jabatan-Jabatan yang berkenaan, akan terus melaksanakan inisiatif, program dan projek yang telah dan sedang dilaksanakan pada masa ini; dan terus mengenalpasti serta memikirkan strategi-strategi serta inisiatif-inisiatif dan program-program baru, bagi mendokong usaha dalam merealisasikan visi dan misi serta hala tuju strategik Kementerian ini.

Yang Berhormat Menteri Sumber-Sumber Utama dan Pelancongan seterusnya menjelaskan, visi dan misi serta hala tuju Kementerian akan dapat direalisasikan dengan memberikan fokus utama kepada perancangan dan pelaksanaan program dan inisiatif yang menjurus kepada usaha-usaha

untuk mendokong pertumbuhan serta peningkatan keluaran industri di bawah **sektor makanan**, iaitu keluaran dari sektor pertanian dan juga keluaran dari sektor perikanan. Penekanan ini adalah selaras dengan Peta Jalan Industri Makanan (*Food Industry Roadmap*), yang memfokuskan kepada meningkatkan keluaran makanan yang berkualiti, halal dan selamat dari industri keluaran utama (*primary production industry*) seperti keluaran hasil industri ternakan dan industri tanaman bagi sektor pertanian; dan industri penangkapan ikan dan akuakultur bagi sektor perikanan, dan keluaran dari aktiviti-aktiviti industri pemprosesan dan nilai tambah berasaskan hasil pertanian dan perikanan, termasuk mengukuhkan keseluruhan ekosistem rangkaian nilai (*value chain*) yang berkaitan dengan industri ini.

Seterusnya, menyentuh mengenai dengan eksport pula, Kementerian telah berjaya mengeksport beberapa produk hasil pertanian seperti *musk melon* dan perikanan seperti udang dan ikan beku keluar negara, dan yang terkini adalah kejayaan mengeksport telur ayam ke Singapura buat yang julung kalinya, dimana pada 1hb Februari 2023 yang baru lalu, sekitar 300,000 biji telur ayam telah berjaya dieksport ke Singapura dan ini akan terus dipertingkatkan.

Disamping usaha-usaha ke arah meningkatkan perkembangan industri sektor makanan, fokus seterusnya adalah menjurus kepada usaha-usaha untuk memenuhi keperluan serta kepentingan terhadap **pembangunan dan pemuliharaan sumber hutan**. Dalam perkara ini, pihak Kementerian melalui Jabatan Perhutanan, akan terus memastikan agar usaha-usaha dalam membangun, melindungi serta memulihara sumber hutan negara akan dilaksanakan secara berterusan bagi memastikan agar aktiviti-aktiviti pembangunan Negara adalah selaras dengan konteks pembangunan yang mampan (*sustainable development*) dan pada masa yang sama bagi mendokong perlaksanaan inisiatif "protokol hijau" di bawah Dasar Perubahan Iklim Kebangsaan Negara Brunei Darussalam. Disamping itu, pihak Kementerian juga akan terus mengenalpasti langkah-langkah dan pendekatan-pendekatan yang inovatif bagi meningkatkan keluaran dari industri perhutanan, dan bagi meraih faedah serta manfaat ekonomi yang dapat diterokai melalui *carbon trading*.

Dan seterusnya fokus terakhir jelas Yang Berhormat Menteri Sumber-Sumber Utama dan Pelancongan, adalah bagi mendokong **pemajuan dan pembangunan industri pelancongan** di Negara ini dengan memfokuskan kepada pembangunan, pengukuhan serta mempromosikan produk-produk pelancongan berteraskan kebudayaan (*culture*), pengembaraan/aktiviti lasak (*adventure*) dan juga alam semulajadi (*nature*); disamping memastikan kualiti infrastruktur serta pemberian perkhidmatan pelancong akan terus dipertingkatkan untuk menarik serta meningkatkan jumlah kedatangan pelancong ke Negara ini.

Sesi muzakarah diteruskan dengan taklimat mengenai pencapaian terkini keluaran kasar sektor sumber-sumber utama dan pelancongan serta hala tuju strategik kementerian sumber-sumber utama dan pelancongan bagi tempoh 2023-2028 yang disampaikan oleh Yang Mulia Setiausaha Tetap, KSSUP dan diikuti dengan sesi perbincangan dan soal jawab.

/TAMAT.

Disediakan oleh:

Kementerian Sumber-Sumber Utama and Pelancongan
Negara Brunei Darussalam

Tarikh: 23 Rejab 1444 / 14 Februari 2023